

## **GARIS PANDUAN PERADUAN BERASASKAN HADIAH**

Muzakarah Jawatankuasa Fatwa MKI Kali Ke-84

15 Disember 2008

### **TUJUAN**

Garis Panduan Peraduan ini yang disediakan untuk memberi panduan kepada semua pihak yang terlibat dalam menganjurkan peraduan yang menawarkan hadiah sebagai ganjaran, sama ada agensi-agensi kerajaan dan swasta, syarikat-syarikat telekomunikasi, media cetak dan elektronik, pengendali konsep peraduan, penaja, orang awam serta mereka yang terlibat secara langsung atau tidak langsung dalam peraduan tersebut.

### **BELAKANG**

1. Dengan kemajuan arus perdana, urusniaga jual beli telah mula diperluaskan dengan pelbagai teknologi moden termasuklah melalui Sistem Pesanan Ringkas (SMS). Bukan sekadar itu, promosi produk jualan juga semakin berkembang pesat melalui instrumen semasa termasuk penganjuran peraduan kontemporari oleh pelbagai pihak telah menjadi begitu popular dan semakin mendapat tempat di kalangan masyarakat.
2. Namun begitu, penganjuran peraduan kontemporari ini yang kebiasaannya menawarkan hadiah contohnya peraduan melalui SMS telah menimbulkan pelbagai polemik dan persoalan khususnya daripada aspek hukum syarak. Justeru, garis panduan ini diterbitkan untuk merungkai segala permasalahan dan kekeliruan sekaligus memastikan seluruh penganjuran peraduan berasaskan hadiah bertepatan dengan prinsip muamalat Islam yang berasaskan kepada aspek ketelusan dan keadilan.
3. Garis Panduan ini adalah berdasarkan keputusan Muzakarah Jawatankuasa Fatwa Majlis Kebangsaan Bagi Hal Ehwal Ugama Islam Malaysia Kali Ke-64 yang bersidang pada 27 Julai 2004 yang telah memutuskan bahawa:

**“Peraduan kuiz melalui Sistem Pesanan Ringkas (SMS) dan seumpamanya adalah mengandungi unsur-unsur eksloitasi, kesamaran (tidak jelas), pertaruhan dan nasib yang tergolong dalam pengertian judi. Dari itu, hukum peraduan kuiz tersebut adalah haram di sisi syarak”.**

## **KRITERIA-KRITERIA YANG MESTI DIELAKKAN DALAM PENGANJURAN PERADUAN BERASASKAN HADIAH**

### **1. Eksloitasi**

- i. Dalam konteks peraduan berdasarkan hadiah, “eksloitasi” bermaksud **suatu perbuatan atau tindakan mempergunakan sesuatu (orang dan lain-lain) untuk kepentingan (keuntungan dan sebagainya) diri sendiri** (Kamus Dewan).
- ii. Eksloitasi juga bermaksud *use selfishly and unfairly for one's own advantage or profit* ( Oxford Dictionary).
- iii. Dalam konteks peraduan, peserta mengharapkan hadiah lumayan yang ditawarkan, manakala pihak pengajur mengambil kesempatan dengan mengenakan caj tertentu dan mengaut keuntungan di atas keghairahan orang ramai yang menyertainya. Perbuatan tersebut adalah suatu bentuk **eksloitasi yang tidak diharuskan oleh Islam**.

### **2. Kesamaran**

- i. Dalam konteks peraduan yang menawarkan hadiah juga, maksud “kesamaran” adalah **sesuatu perkara yang kurang jelas keadaannya** (Kamus Dewan).
- ii. Kesamaran juga dimaksudkan dengan *look or sound different from normal; give false appearance* (Oxford Dictionary).
- iii. Dr. Yusof al-Qardhawi menjelaskan tentang pendirian Islam terhadap perbuatan yang **samar-samar atau syubhah**. Beliau menyatakan bahawa Islam memberikan satu garis panduan yang disebut sebagai **sikap berhati-hati kerana takut terlibat dalam perbuatan haram**. Melalui sifat ini seseorang Islam dituntut supaya menjauhkan diri daripada sesuatu masalah yang masih

samar-samar, sehingga dengan cara tersebut dia tidak melakukan suatu perbuatan yang haram.

- iv. Perbuatan seperti ini termasuk dalam perkara *sadduz zara'i* (menutup pintu daripada melakukan kejahanan). Perkara tersebut juga merupakan salah satu pendidikan untuk orang Islam memandang lebih jauh serta menyelidik terhadap hidup dan manusia itu sendiri.

Ini berdasarkan sabda Rasulullah s.a.w. yang bermaksud:

*"Yang halal sudah jelas dan yang haram juga sudah jelas, di antara kedua-duanya itu ada beberapa perkara yang belum jelas (syubhat), banyak orang yang tidak tahu; apakah dia termasuk dalam perkara yang halal ataukah yang haram? Maka sesiapa yang menjauhinya kerana hendak membersihkan agama dan kehormatannya maka dia akan selamat dan sesiapa yang mengerjakan sedikitpun daripadanya hampir-hampir dia akan jatuh ke dalam haram, sebagaimana orang yang menggembala kambing di sekitar daerah larangan, dia hampir-hampir akan jatuh kepadanya. Ingatlah bahawa tiap-tiap raja mempunyai daerah larangan. Ingat pula bahawa daerah larangan Allah itu ialah semua yang diharamkan."*

*(Riwayat al-Bukhari, Muslim dan al-Tarmizi  
dan riwayat ini adalah lafaz al-Tarmizi)*

*(Dr. Yusof al-Qardhawi, al-Halal  
wa al-Haram fi al-Islam, hal 37)*

- v. Dalam konteks peraduan kontemporari ini, penganjur mengenakan **caj bayaran dalam pelbagai istilah** seperti wang pertaruhan, wang penyertaan, yuran pertandingan dan sebagainya. Penganjur juga menyediakan **syarat peraduan yang kurang telus**, serta mengelirukan. Ini menyebabkan peserta bergantung kepada nasib di samping menyimpan angan-angan untuk memperolehi hadiah yang lumayan. **Kesamaran yang berlaku** dalam peraduan seumpama ini boleh menyebabkan orang ramai terlibat dalam **perbuatan perjudian tanpa mereka sedari**.

### 3. Pertaruhan

- i. Dalam konteks peraduan berasaskan hadiah, “pertaruhan” bermaksud **wang dan lain-lain yang dipasang dalam perjudian (Kamus Dewan)**.
- ii. Pertaruhan juga bermaksud **money etc risked or gambled on the unknown result of a future event** (Oxford Dictionary).
- iii. Peraduan kontemporari contohnya melalui SMS adalah suatu **permainan yang melalaikan** dan boleh dikategorikan dalam **permainan al-nardu** (buah dadu-permainan tradisi masyarakat Arab yang mengandungi perjudian dan pertaruhan). Menurut Dr. Yusof al-Qardhawi (*Fatawa al-Mu'asarah* jilid 7, hal 465 dan 466) para fuqaha mengharamkan permainan ini berdasarkan kepada dalil al-Quran dan hadis serta bentuk permainan tersebut yang mengandungi unsur judi yang diharamkan.

Mereka merujuk kepada firman Allah S.W.T. yang bermaksud:

*"Wahai orang yang beriman! Sesungguhnya arak, judi, pemujaan berhala dan mengundi nasib dengan batang-batang anak panah, adalah (semuanya) kotor (keji) dari perbuatan syaitan. Oleh itu hendaklah kamu menjauhinya supaya kamu berjaya."*

*(Surah al-Ma'idah ayat 90)*

Sabda Rasulullah s.a.w. yang bermaksud:

*"Sesiapa yang bermain permainan al-Nardu (perjudian) sesungguhnya ia telah melakukan maksiat kepada Allah dan rasul-Nya".*

*(Riwayat Abu Daud)*

- iv. Dalam konteks peraduan, unsur perjudian yang terdapat di dalamnya adalah kerana ia mengandungi unsur pertaruhan, setiap peserta akan dikenakan **caj bayaran** melalui pelbagai istilah yang mengaburi mata peserta sebagai **syarat untuk menyertai peraduan** tersebut. Bayaran inilah yang dinamakan pertaruhan.

#### 4. Nasib

- i. "Nasib" bermaksud **melakukan sesuatu dengan harapan untuk mendapat keuntungan; bertaruh** (Kamus Dewan).
- ii. Nasib juga bermaksud **chance, esp though of as force that bring good or bad fortune** (Oxford Dictionary).
- iii. Perbuatan peserta yang membayar caj peraduan dengan harapan mendapat keuntungan atau habuan hadiah ketika menyertai sebarang peraduan yang dianjurkan perbagai pihak adalah tidak diharuskan oleh Islam. Ia sama dengan perbuatan mempertaruhkan wang lalu bergantung harapan kepada nasib untuk mendapat keuntungan yang lebih banyak. Perbuatan bergantung kepada nasib ini bertentangan dengan ajaran Islam berdasarkan firman Allah S.W.T. yang bermaksud:

*"Wahai orang yang beriman! Sesungguhnya arak, judi, pemujaan berhala dan mengundi nasib dengan batang-batang anak panah, adalah (semuanya) kotor (keji) dari perbuatan syaitan. Oleh itu hendaklah kamu menjauhinya supaya kamu berjaya."*

*(Surah al-Ma'idah ayat 90)*

- iv. Dalam konteks peraduan berasaskan hadiah, ada segelintir pengajur peraduan meletakkan kaedah penentuan pemenang melalui kriteria peserta yang berjaya menjawab soalan dengan tepat dan paling pantas. Kaedah pemilihan pemenang seumpama ini adalah tidak patuh syariah kerana peserta yang menjawab soalan dengan tepat masih tidak ada jaminan untuk dipilih sebagai pemenang kerana terpaksa bergantung kepada nasib semata-mata untuk menjadi peserta yang terpantas menjawab soalan.

#### 5. Pembaziran

- i. "Pembaziran" bermaksud **perbuatan membazirkan (wang, masa tenaga dsb)** (Kamus Dewan).
- ii. Pembaziran juga dimaksudkan dengan **not thinking of the consequences or of danger; rash or impulsive.** (Oxford Dictionary).
- iii. Islam melarang umatnya melakukan perbuatan mensia-siakan

harta atau wang pada tempat yang tidak wajar dan tidak diharuskan oleh Allah S.W.T.. Ini bermakna walaupun sedikit yang kita belanjakan jika bukan pada tempat yang wajar, maka ia tetap dikira sebagai membazir. Tidaklah semestinya banyak atau sedikit semata-mata yang menjadi ukuran kepada perkiraan membazir atau tidaknya dalam sesuatu perbelanjaan. Perbuatan membazir sangat dilarang dalam Islam malah ia dianggap bukan daripada perbuatan seorang Islam. Ini berdasarkan firman Allah S.W.T. yang bermaksud;

*Sesungguhnya orang yang boros itu adalah saudara-saudara syaitan sedangkan syaitan itu pula adalah makhluk yang sangat kufur kepada tuhannya.”*

*(Surah al-Nisaa' ayat 26-27)*

- iv. Dalam konteks peraduan berdasarkan hadiah, ramai peserta menghabiskan wang mereka semata-mata untuk meraih hadiah yang ditawarkan. Walau bagaimanapun sebilangan kecil sahaja peserta yang akan memperolehi hadiah, manakala sebahagian besar lagi akan mengalami kerugian serta kehilangan wang dalam pertaruhan. Mereka telah membazirkan masa, wang dan tenaga semata-mata untuk mendapatkan hadiah yang belum pasti diperolehi.

## PANDUAN KEPADA PESERTA

Sebelum menyertai sebarang peraduan yang berdasarkan hadiah, peserta haruslah meneliti dan memahami perkara-perkara berikut:

1. Bentuk dan operasi peraduan.
2. Terma dan syarat peraduan dengan jelas.
3. Memastikan peraduan yang disertai tidak mengandungi unsur-unsur yang bercanggah dengan hukum syarak seperti perjudian, pembaziran, eksploitasi, keraguan dan kerugian kepada peserta.

4. Memastikan caj yang dikenakan terhadap mereka sama seperti caj biasa sebelum peraduan berlangsung jika peraduan tersebut dianjurkan melibatkan perbualan telefon dan kaedah SMS.
5. Peraduan yang disertai bermanfaat dan tidak mengandungi unsur hiburan yang melampau, aktiviti yang melalaikan dan seumpamanya.
6. Peserta hendaklah merujuk kepada pihak berkuasa yang berautoriti sekiranya terdapat keraguan mengenai sesuatu peraduan terutamanya daripada sudut hukum syarak dan perundangan negara.
7. Peserta dinasihatkan agar tidak terlalu taksub dan fanatik kepada sesuatu peraduan yang disertai sehingga meninggalkan tugas wajib.

## PANDUAN KEPADA PENGANJUR

1. **Yuran Pendaftaran Dan Caj Tambahan**
  - i. **Penganjur tidak boleh mengenakan apa-apa caj atau yuran** kepada peserta sebagai bayaran pendaftaran untuk menyertai peraduan yang dianjurkan bagi mengelakkan wujudnya unsur-unsur perjudian dan pertaruhan.
  - ii. **Tiada sebarang caj tambahan** boleh dikenakan kepada peserta peraduan contohnya caj kos pengurusan, caj ke atas setiap set soalan peraduan dan seumpamanya.
  - iii. Jika peraduan dianjurkan melalui telefon dan seumpamanya, pihak penganjur **tidak boleh menaikkan caj perbualan telefon dan SMS daripada caj semasa** bagi mengelakkan wujudnya unsur perjudian.
2. **Terma Dan Syarat Peraduan Yang Jelas**
  - i. Penganjur mestilah menyatakan tujuan, syarat-syarat penyertaan, ganjaran hadiah, kaedah pemilihan pemenang, tempoh masa dan seumpamanya dengan tepat, jelas dan terperinci di dalam terma dan syarat peraduan.

- 
- ii. Sekiranya peraduan tersebut melibatkan **penjualan produk** dan seumpamanya maka perkara tersebut **perlu diperincikan dengan jelas** di dalam terma dan syarat.
  - iii. Terma dan syarat juga mestilah **adil, tidak mengandungi unsur penipuan ataupun helah, serta tidak berat sebelah** samada di pihak pengajur maupun pelanggan dan mestilah tidak bercanggah dengan syarak.
  - iv. Terma dan syarat mestilah **dapat diakses sepenuhnya** oleh pelanggan dengan jelas samada melalui **iklan di media cetak, media elektronik atau seumpamanya**.
  - v. Terma dan syarat mestilah **jelas, mudah difahami serta tidak mengelirukan** masyarakat awam.

### 3 Promosi Dan Iklan

- i. Maklumat penting di dalam terma dan **syarat iaitu syarat-syarat penyertaan, bentuk operasi peraduan, ganjaran hadiah, syarat-syarat pemenang** dan seumpamanya mestilah **dinyatakan sepenuhnya dengan jelas, mudah difahami** oleh masyarakat awam.
- ii. Jika peraduan tersebut melibatkan sebarang penjualan barang atau produk, **promosi penjualan barang** atau produk tersebut mestilah lebih **difokuskan berbanding promosi peraduan**.
- iii. **Iklan-iklan dan promosi** di dalam media cetak dan elektronik mestilah:
  - a) **menggambarkan sepenuhnya** promosi peraduan tersebut;
  - b) **tidak mengandungi unsur-unsur eksloitasi** seperti **mengeksplorasikan wanita** dan seumpamanya sebagai satu daya tarikan; dan
  - c) **tidak mengandungi unsur-unsur provokasi, paksaan serta mengelirukan** peserta.

## SISTEM PERADUAN YANG JELAS

### 1. Matlamat Peraduan

- i. Peraduan yang dianjurkan mestilah mempunyai **matlamat yang bermanfaat, membina daya intelektual, memupuk sikap positif** dan seumpamanya.
- ii. Tidak dijadikan **sebagai helah untuk mengaut keuntungan** yang berlipat ganda.
- iii. **Tidak melalaikan** sehingga menyebabkan peserta meninggalkan kewajipan seharian.

## 2. Bentuk Soalan Peraduan

Soalan- soalan peraduan mestilah:

- i. bermanfaat, ilmiah dan benar- benar menguji kepintaran;
- ii. tidak tertumpu kepada perkara- perkara yang tidak membina minda serta melalaikan;
- iii. tidak mengelirukan; dan
- iv. tidak bercanggah dengan syariat Islam

## 3. Kaedah Pemilihan Pemenang

- i. Setiap penyertaan peserta mestilah **disemak dan dihakimi** dengan adil, telus, amanah dan tidak berat sebelah.
- ii. Pemenang peraduan **tidak boleh ditentukan dengan kaedah cabutan rambang (lucky draw)** yang bersandarkan kepada faktor nasib.
- iii. Jika sekiranya terdapat lebih daripada satu penyertaan yang menjawab semua soalan objektif dengan betul dan mempunyai **markah/mata yang sama**, maka peserta hendaklah diberi **soalan subjektif** contohnya menulis cogankata dan seumpamanya. Hakim mestilah mengadili soalan subjektif tersebut dengan adil sebelum menentukan pemenang peraduan.

## 4. Tempoh Masa Peraduan

Jika peraduan tersebut mempunyai sesuatu tempoh had masa penganjuran dan menjawab soalan, maka ia perlulah dimaklumkan kepada peserta sebelum peraduan bermula.

## **GANJARAN / HADIAH**

1. Hadiah peraduan disediakan oleh pihak pengajur mestilah daripada sumber yang halal.
2. Hadiah peraduan tidak boleh diambil daripada kumpulan wang peserta samada melalui yuran penyertaan, caj dan seumpamanya.
3. Sumber dana hadiah tidak boleh diambil daripada hasil caj perkhidmatan yang di kenakan untuk sms dan seumpamanya.
4. Hadiah yang disediakan oleh pihak pengajur mestilah bernilai, bermanfaat dan memenuhi spesifikasi yang telah dinyatakan di dalam terma dan syarat peraduan.
5. Hadiah peraduan hendaklah disediakan terlebih dahulu sebelum sesuatu peraduan dijalankan bagi mengelakkan timbulnya sebarang unsur penipuan.
6. Tempoh penyerahan hadiah kepada peserta mestilah ditetapkan dan dinyatakan di dalam terma dan syarat peraduan dengan jelas.

## **PENUTUP**

Garis Panduan yang diterbitkan ini adalah diharap dapat memberikan panduan kepada semua pihak yang terlibat di dalam pengajuran peraduan yang menawarkan hadiah sebagai ganjaran. Semoga usaha ini dapat memastikan keseluruhan operasi peraduan mematuhi prinsip-prinsip syariah.